

LI CWÂRBAU ÈT L' RASKIGNOL.

On bia djoû, au bon timps, al pure copète d'on tchin.ne,
On gros spotche-broûs d' cwârbau, qui lomeut ça tchanter,
Cwâkieûve di sès pus fwârt, mau-apris èt sins-jin.ne,
Pinsant qu'avou s' grosse vwès, on l' va adolmiter.

Catchî drî lès fouyas, on bia gaîy raskignol
Rèpèteûve totes sès notes, come po r'mêrci l' solia,
Sès parints èt l' Bon Diè, d' l'awè mètu è scole
Po-z-aprinde à tchanter, èt d' l'awè fait si bia.

Li cwârbau ètind ça ! I crîye one miète pus fwârt :
« Quand ç' qui t'aurès compris qui t' passes ti timps po rin !
I-gn-a nuk di nos deûs qui r'coneut qu'il a twârt ?
Nos lomerans on-ârbite, onk qui n' nos coneut nin.

I faurè qu'i nos l' jure èt garanti d'èsse neûte :
Si bouye ? Mostrer au dwègt l' ci d' nos deûs qu' tchante li mia !
Po s' payemint, il aurè drwèt à one bone vîye keûte ;
Gn-aurè nin à r'nicter pusqu'i frè por on mia ! »

On côp l' contrat siné, li prumî qui s' présente,
C'è-st-on roselant couchèt qui vint d' quitter s' moman ;
Il a l'aîr tot pièrdu, èt fé chonance di sinte
Après one saqwè d' bon po chiquer tot rotant.

« Ê ! là, vos !, di-st-i l'ôte, i nos faut fé con'chance !
Li raskignol èt mi, nos-avans dandjî d' vos ;
Vos èstoz ètrangér' ! Dijoz m', à vosse chonance,
Liquék èst ç', di nos deûs, qu'a l' pus bèle vwès, por vos ?

Dji v' pou acèrtiner qu'on-z-èst pêrcé binaujes
Qui l' jujemint qu' vos rindroz, on s'î pôrè fiyî ;
Choûtez bin, èt pèser, èt tûzer à voste auje :
Li ci qu' sèrè batu n'aurè pus qu'à r'plèyî.

– Dji veu, di-st-i l' couchèt, qui l'afaîre èst sérieûse !
Pèrmètoz qui dj' m'achîde, por mi p'lu reflèchi .
Si m' moman vièreut ça, come èle sèreut eûreûse !
On juje !» Si cô infèle ! On choûte tot ç' qu'on juje dit.

« Mès choûtwès sont-st-au laudje ! Adon, l' sintince va tchaîr !
Dji v's-advêrti qui, mi, dji n'aurè pont d' pitié !
Li prumî qu' tchanterè faus, djè l'oblidjerè à s' taîre !
Li juje qu'èst pad'avant vos n'èst nin v'nu po djouwer. »

Li cwârbau, sûr di li, lance one vîye ârguèdène,
Si bin fwârt qui lès djins s' dimandenut ç' qui c'èst d' ça ;
L'ôte prind s'-t-alin.ne, s'ènonde, come po tchanter matènes ;
On-aîr qui r'mûwe lès tripes, sins pont fé d' tralalas.

« Asteûre, c'è-st-à vosse toû ! Quî ç' qu'a gangnî l' concôurs ? »
C'èst co todi l' cwârbau qui riv'neut su l' quèstion.
Li couchèt, tot pèneûs, sûremint à mitan soûrd :
« C'èst l' cwârbau ! : coûrt èt bon, come li curé d' Tchampion ! »

Nosse pitit raskignol avore èt s' pète à braîre !
« À qwè ç' qui ça v's-avance di v' disbautchî come ça ?
C'èst l' cwârbau qu'èst l' pus fwârt, èt il èst su sès tères !
Il a mia tchanté qu' vos, mins c'èst vos qu'èst l' pus bia !

– Dji m' fou d'awè pièrdu, c'èst nin ça qui m' tracasse !
Mi, dji sé bin ç' qui dj' vau, tot l' rèsse, dji m' caye di ça ;
Ci qui m' fait co l' pus d' pwin.ne, c'èst qu' tos lès cis di m' race
Si vont d'mander dovint ç' qui l' juje, c'è-st-on pourcia !»

Raskignol : rossignol
Spotche-broûs : primaire vaniteux
Adolmiter : choyer, dorloter
Keûte : bière forte
Ârguèdène : ritournelle
Coûrt èt bon come li curé d' Tchampion : expression consacrée : sans appel

Albert Delvaux